



Komunikadu Imprensa
02 Agostu 2022

JSMP preokupa ho efetividade no efisiénsia implementasaun Lei Organizaun Investigasaun Kriminál liuliu iha kazu Violénsia Bazeia ba Jéneru (VBJ)

Iha loron 14 Juñu 2022, Parlamentu Nasionál aprova Lei Organizaun Investigasaun Kriminál no promulga husi Presidente Repúblika iha loron 08 Jullu 2022. Lei ne'e públika iha Jornál Repúblika ho Lei Nú. 9/2022, iha 13 Jullu. Prezensa lei ne'e hodi regulariza organizaun no funsionamentu investigasaun kriminál iha ámbitu lei prosesuál penál nian. Objetivu fundamentál mak atu fornese kondisaun efisiénsia ida ne'ebé di'ak liu ba sistema judisiáriu iha investigasaun kriminál nian no efikásia iha kombate krime. Inklui mós halo koordinasaun no kooperasaun polisiál iha nível internál ka internasionál.

Ho ida ne'e, Lei Organizaun Investigasaun Kriminál define kona-ba kompeténsia orgaun judisiária sira liuliu Polísia Nasionál Timor Leste (PNTL) no Polísia Sientífika Investigasaun Kriminál (PSIK) iha atendimentu kazu sira. Alende ne'e, regula mós kona-ba devér sira husi polísia kriminál, medida espesiál sira husi investigasaun kriminál, no kooperasaun sira tantu kooperasaun entre órgaun polísia kriminál no entidade relevante sira seluk.

“JSMP apresia ho inisiativa deputadu sira nian hodi kria lei ida ne'e tanba lei ne'e define no atribui devizaun kompeténsia entre órgaun investigasaun kriminál sira, liuliu PNTL no PSIK. Maibé JSMP kestiona maka'as kona-ba ninia efetividade no efisiénsia iha implementasaun liga ho kompeténsia entre PNTL no PSIK. Ezemplu mak iha atendimentu ba kazu VBJ (exemplu VD no VS). JSMP kestiona ida ne'e tanba dalabarak kazu sira ne'e envolve arguidu ida maibé ho tipu kazu barak (grave no simples) no vitima mós liu ema na'in ida. Ho realidade ida ne'e, kuandu lei ne'e implementa sei hamosu konfuzauun iha faze investigasaun nian tanba arguidu sei hetan investigasaun husi PNTL no PSIK tuir kompeténsia ne'ebé lei ne'e fó ona,” dehan Diretora Ezekutiva JSMP, Sra. Ana Paula Marçal.

Relasiona ho definisaun no atribuisaun kompeténsia ne'e, dezde inísiu kriasaun PSIK, JSMP mós rekomenda ona atu define ho klaru kompeténsia entre PSIK, KAK no PNTL ka órgaun investigasaun kriminál sira seluk, nune'e la hamosu konfliktu ka sobrepozisaun entre órgaun sira ne'e. Mezmu nune'e, definisaun no atribuisaun

kompetensia PNTL no PSIK iha lei ne'e, tuir JSMP nia haree sei hamosu konfuzau no la efisiensia iha atendimentu kazu sira.

Exemplu kazu ne'ebé bele hamosu konfuzau iha faze investigasaun nian mak hanesan Arguidu A komete krime maus-tratus ba menór hasoru nia oan no komete krime omisídiu simples hasoru nia feen. Tuir kompetensia ne'ebé fahe ona, krime maus-tratus ba menór tama iha kompetensia PNTL no omisídiu simples tama iha kompetensia PSIK.

Exemplu seluk, Arguidu B komete krime ameasa no tentativa omisídiu hasoru nia feen. Krime ameasa kompete ba iha PNTL no "*tentativa omisídiu*" sei kompete ba iha PSIK ka PNTL atu halo investigasaun?. Se tentativa omisídiu kompete ba PSIK, sei hamosu mós konfuzau no laiha efisiensia no efetividade iha prosesu investigasaun ne'e rasik. Ho devizaun kompetensia hanesan ne'e mak investigasaun sei halo husi instituisaun rua ne'e ba arguidu ida de'it.

Tanba ne'e, JSMP haree katak sei mosu konfuzau ba iha atendimentu husi instituisaun rua ne'e iha faze investigasaun hodi labele atinze objetivu fundamentál husi lei ne'e atu fornese kondisaun efisiensia ida ne'ebé di'ak liu ba sistema judisiáriu hodi asegura efisiensia iha investigasaun kriminál nian no efikasias iha kombate krime.

Parte seluk, JSMP preokupa mós kona-ba efisiensia iha prosesu atendimentu kazu sira liga ho kompetensia PNTL nian ne'ebé hatur iha alinea 2) Artigu 9 katak bainhira PSIK la destaka iha munisípiu sira, PNTL iha obrigasaun atu halo investigasaun ba kazu sira ne'ebé kabe ba kompetensia PSIK nian bazea ba orientasaun husi Ministériu Públiku. Tuir JSMP mekanizmu ida ne'e sei hamosu birokratizasaun iha prosesu kazu sira iha futuru.

Alende preokupasaun kona-ba implementasaun kompetensia entre PNTL no PSIK iha atendimentu kazu sira, JSMP mós kestiona kona-ba rekursu umanu ne'ebé PSIK iha hodi responde ba kompetensia ne'ebé lei ne'e atribui ona ba sira. PSIK nia edifísiu própriu iha de'it nasional no laiha edifísiu filiál sira iha munisípiu tomak inklui RAEOA. JSMP kestiona mós kona-ba sensibilidade PSIK nian iha atendimentu kazu VBJ ne'ebé tinan barak PNTL-VPU hala'o ona iha ita nia nasaun.

Relasiona ho preokupasaun sira ne'e, JSMP rekomenda ba makfoti desizaun sira atu tetu, analiza no haree ba kontestu real Timor nian atu bele hadia filafali lei ne'e hodi hatur kompetensia PNTL no PSIK ho klaru atu la hamosu konfuzau. Nune'e mós rekomenda atu bele promove kooperasaun no koordenasau institusional ne'ebé efetivu hodi halo atuasaun ba kazu krime sira.

JSMP mós sei prepara paraser ida hodi fó JSMP ninia hanoin sira relasiona ho lei ne'e.

Atu hetan informasaun kompletu bele kontaktu:

Ana Paula Marçal

Diretora Executiva JSMP

Email: ana@jsmp.tl

Telefone: 3323883 | 77040735

Website: <http://jsmp.tl/>